

中州名賢集



中州名賢集



國朝中州名賢集卷二

潛庵湯先生文鈔目錄

敬陳史法疏

諸儒執經問難論

春王正月辨

上孫徵君先生書

答耿逸庵書

答顧甯人書

答陸稼書書

孝經易知序

金
贛州府誌序

雪亭夢語序

送魏蓮陸歸保定序

徵君孫先生九十壽序

睢州移建廟學碑記

重建蘇州府儒學碑記

嵩陽書院記

潼關樓刻詩記

重建信陵君祠記

徵君孫鍾元先生墓誌銘

砥石庵先生墓誌銘

王氏五節烈傳

楚南湘潭後學黃舒曷編輯

國朝中州名賢集卷二

潛庵湯先生文鈔

敬陳史法疏

順治十一年

奏爲敬陳史法以襄文治事臣學識疏陋備員史館恭逢

皇上虛己諮詢臣敢不謬陳一得以備

採擇臣竊惟史者所以昭是非助賞罰也賞罰之權行於一時是非之衡定於萬世

皇上御極初年卽

命史臣纂修明史仰見

皇上留心文獻與唐太宗勅魏徵等撰次隋書明太祖
勅宋濂等纂修元史可謂千古哲王若合符節但當時
纂修止據實錄未暇廣採臣愚竊以爲立法宜嚴取材
貴備實錄所紀恐有不詳臣謹取其大畧爲我

皇上陳之如靖難兵起建文易號永樂命史臣重修實
錄則低昂高下之間恐未可據他如土木之變大禮之
議事多忌諱況天啟以後實錄無存將何所依據焉一
也二百七十餘年英賢輩出有身未登朝而懿行堪著
或名僅閭巷而至性可風萬一輜軒未採金匱失登則
姓字無傳何以發潛德之光前代史書如隱逸獨行孝

友列女諸傳多實錄所未備者二也天文地理律歷河
渠禮樂兵刑藝文財賦以及公侯將相爲志爲表不得
其人不歷其事不能悉其本末原委三也臣謂今日時
代不遠故老猶存遺書未燼當及此時開獻書之賞下
購求之令凡先儒紀載有關史事者擇其可信並許參
考庶幾道法明而事辭備矣臣伏讀順治九年十一月
十七日

上諭云明末寇陷都城君死社稷當時文武諸臣中豈
無一二殉君死難者幽忠難泯大節可風大哉

王言開一代忠孝之原肅萬載臣子之極一時在京諸

卷二
臣若范景文倪元璐劉理順等皆被

旌錄自當照耀史冊但明末寇氛旣張蹂躪數省或銜
命出疆或授職守土或罷官閒居以至布衣之士巾櫛
之婦其間往往有抗節不屈審義自裁者幸遇

皇上扶植人倫發微闡幽而忠魂烈節猶有鬱鬱寒泉
之下者則後世何勸焉伏乞

勅下各地方督撫確訪

奏聞併將實蹟宣付史館與范倪諸臣並例同書則闡
幽之興愈爲光昭矣更有請者宋臣歐陽修纂五代史
不爲韓通立傳後世譏之宋史修於至正三年而不諱

文謝之忠元史修於洪武二年而並列丁普之義古今
躋之

皇上應

天順人救民水火雲霓之望四方俟蘇然元二年間亦
有未達

天心徒抱片節硜硜之志百折靡悔雖逆我顏行有乖
倒戈之義而臨危致命實表歲寒之心此與海內渾一
竊名叛逆者情事不同伏望

皇上以萬世之心爲心

渙發綸音槩從寬宥俾史臣纂修俱免瞻顧則

如天之度媲美前王於以獎勵臣子昭示後世其於綱
常似非小補臣在史言史不識忌諱無任戰慄隕越之
至

諸儒執經問難論

院試

天地之理備于經帝王之道本于學學之不修則治之
隆替可知也而經之不明則學之純駁又可知也歷觀
詩書所載自堯舜三代何嘗有不學問之天子乎其深
居燕閒几杖有銘臨雍拜老乞言有典勤學好問蓋有
後世儒生所不及者何其密也而君臣之間吁咈告誡
皆成訓典又何盛也後世有言天子安事詩書者矣卽
有一二好學之主亦或馳騫于黃老或殫情于詞賦雖
文詞爾雅亦可謂惑于流俗而不篤于自信者也乃觀
漢明帝養老禮成引桓榮上堂使諸儒執經問難于前

園橋門而觀者億萬人噫此三代之遺風與夫漢之賢
主首稱文帝矣世徒見文帝治貴清靜而比隆成康武
帝尊尚儒術而末年驕侈遂以爲儒術寡效黃老多功
不知文帝之賢明得儒術之大端而其不免于雜霸者
則儒行之不純故賈誼陳王道則謙讓而未遑也禮樂
庠序之事猶未盡興而強秦之遺風餘俗猶未盡除也
夫文帝之賢者而若此則學問之事蓋亦難矣至于武
帝雖有表章經史之功然亦好其文辭耳不然以雄才
大略之主當西京治安之隆使誠慨然于堯舜文武之
丕績又有董仲舒諸人以爲之輔則建元之隆可與三

代爭烈又何至興師邊鄙失王師不戰之訓骨肉殘忍
昧家人反身之義哉由此言之則孝文得其一二而未
見其大全孝武慕其虛名而未求其實效二者均失也
乃光武創業之際投戈講藝明帝承建武之後戢武未
幾而臨雍拜道此可謂不惑乎流俗而篤于自信者矣
觀其東平來朝而詠及采菽雒山出鼎而推及易象不
亦渢渢乎先王之盛哉東漢之世節義章明未必非光
武明帝父子倡率之功也惜也文物雖盛而貽謀無術
一變而章和再變而安順經術不永治道遂漓君子悼
之矣且當時執經之徒不過班賈諸人耳要皆文章爾

雅之流非有明二帝三王之道天地之所以著鬼神之
所以幽若曾參孟軻之徒也夫天下未嘗無大賢蓋由
士有志而上不重耳使明帝果究其實而不纂其文而
曰天下無正誼明道之儒出而應之吾不信也其後諸
儒碌碌無聞而桓榮車馬印綬誇耀生徒知當日之所
問難者亦祇太平之盛觀而非究心經術之實也夫近
代人主之學莫盛于漢而漢又莫如文武光明然所就
皆如此則欲求帝王之學者舍詩書所載將何取法焉

春王正月辨

聖人之書明白簡易而後儒推求過甚遂成不決之
者如春王正月之類是也註春秋者不下數十家置
王正月四字不論者固有之其以周改月兼改時者
漢孔安國鄭康成至明趙子常王陽明賀景瞻也以
周改月不改時者則宋程伊川胡康侯至明劉文成也以
周不改時兼不改月者則宋蔡仲默魏華父至明章本
清也諸家引經據傳自以爲確不可易而余則直以春
秋本文斷之而已矣春秋桓公八年冬十月雨雪十月
者以周正爲建酉月故雨雪爲非時若夏之十月建亥